



Nyawa hujung tanduk

Dua jambatan berisiko runtuh akibat hakisan, keselamatan penduduk terancam

KERLING – Hujan berterusan bukan saja mengakibatkan banjir di beberapa kawasan di daerah ini, malah terdapat kejadian tebing sungai runtuh yang disebabkan hakisan.

Hakisan turut mengakibatkan kesan serius apabila dua jambatan di Kampung Jawa dan Kampung Jawa Tambahan di sini berisiko runtuh.

Pegawai Daerah Hulu Selangor, Nor Hisham Ahmad Dahlan berkata, hasil lawatan kerja beliau bersama Jabatan Perairan dan Saliran (JPS) dan Jabatan Kerja Raya (JKR) semalam mendapati kesan hakisan di sepanjang Sungai Kerling berada pada tahap membimbangkan dan tindakan sewajarnya perlu diambil bagi mengelak kejadian tidak diingini.

“Tinjauan di Kampung Jawa mendapati keadaan tebing sungai telah terhakis dan struktur Jambatan Kampung Jawa amat berisiko jika tebingnya tidak dirawat.

“Pihak JPS perlu meletakkan batu sangkar (gabien) bagi menyokong tebing agar tidak terhakis dan mengelak daripada berlaku runtuhan lebih serius,” katanya kepada Sinar Harian di sini semalam.

Lawatan beliau turut disertai



Nor Hisham (kanan) ditemani Nur Salim melihat keadaan Jambatan Belia yang terputus akibat hakisan.

Pegawai JPS Hulu Selangor, Abdul Rahman Harun dan Jurutera Jalan JKR Hulu Selangor, Ali Mohamad Yusof.

Turut serta, Penghulu Mukim Kerling, Jamil Abu Bakar dan Pengerusi Jawatankuasa Kemajuan dan Keselamatan Kampung (JKKK) Kampung Jawa, Nur Salim Bilal.

“ Hanya batang-batang pokok digunakan bagi menyambungkan jambatan tersebut dan kami bimbang keselamatan penduduk terutama penoreh getah yang menggunakan laluan di situ.”

Nur Salim

Tangguh seketika kerja korek pasir

TAMBAHNYA Nor Hisham, berikutan kebimbangan berlaku kejadian lebih buruk beliau terpaksa mengarahkan Kumpulan Semesta Sdn Bhd (Semesta) menangguk seketika kerja-kerja mengorek pasir di kawasan tersebut.

Menurutnya, penanggukan itu dibuat sehingga keadaan selamat.

“Berdasarkan tinjauan, hakisan dan runtuhan tebing berlaku di beberapa kawasan sepanjang 10 kilometer di Sungai Kerling ini.

“Malah terdapat hakisan teruk di Kampung Jawa Tambahan sehingga mengakibatkan Jambatan Belia di sini terputus,” katanya.

Beliau berkata, jambatan tersebut perlu dibaiki segera bagi memudahkan penoreh getah melalui jambatan itu ke lading getah bersebelahan.

Menurutnya, JKR akan membuat anggaran kos bagi membaik pulih jambatan serta kos pemasangan gabien.

JPS arah Semesta bersihkan sungai

SEMENTARA itu, Abdul Rahman berkata, pihak JPS akan mengarahkan Semesta membersihkan batang pokok yang tumbang di tepi sungai serta dahan-dahan pokok yang tersangkut pada tiang jambatan.

Menurutnya, kerja-kerja pemBERSIHAN itu perlu dilakukan bagi memastikan aliran air sungai lancar.

Segera baiki jambatan

DALAM pada itu, Nur Salim berharap Jambatan Belia yang terputus akibat hakisan tanah segera dibaiki bagi memudahkan penduduk menjalankan kerja menoreh getah seperti biasa.

“Hanya batang-batang pokok digunakan bagi menyambungkan

jambatan itu dan kami bimbang keselamatan penduduk terutama penoreh getah yang menggunakan laluan di situ,” katanya.

Beliau berkata, pemantauan berterusan juga perlu dilakukan pihak berkuasa bagi memastikan keadaan Sungai Kerling selamat.

Bimbang tragedi banjir buruk berulang

MENURUTNYA, bukan saja kejadian hakisan dan tebing sungai runtuh dibimbangi berlaku malah penduduk sudah pasti bimbang tragedi banjir buruk yang menenggelamkan Kampung Jawa pada tahun 2009 berulang.

Nur Salim berkata, kejadian banjir besar pada 14 April 2009 itu menenggelamkan kira-kira 100 buah rumah di Kampung Jawa, Kampung Pasir, Ladang Jernih dan Kampung Orang Asli Kuala Kerling.

Katanya, lebih 400 keluarga terjejas akibat banjir tersebut namun tiada kemalangan jiwa dilaporkan.



Nor Hisham (dua, kiri) melihat tebing sungai berdekatan Jambatan Kampung Jawa yang runtuh akibat hakisan.

